

Hibru

Whịné Naalemané ensel-rape tẹteró betera

¹ Mo take bitiré wouraalu, Kótóné fo kae kae tumó, ama kọlọ whịrapepaae mo dekéro félimó depa, atimanémo dọ Juda fakené noutererapepaae dua ipakalepó.

² Téyaletai, mió i kemeratere alimó, ti Kótóné dere fo ama Naalemané dapaae yalepó. Ti fea ọla ọla ai naalené amatóro sọpóló yóo, sọro haetamo ó ere ọla ọlakélé fea ama aleyópóló, Kótóné ai sekéné naase tuamó mulóo, yalepó.

³ Kótóné ama mo kae ere dẹ wisinaale ai naale tuamó dẹyó faletai, mo so whị feané kolópóló hakearó betera. So whịné ai naale kilitu, ama alima ere alatóro erapóló tuénérapó. Samó ó i haemó betere ọla ó ere ọla feané du betere ala hale deté fu betera, ai naalené doasi fotokọ bole foné hale eratétóro fu betera. So whị feané dowi ala fokóló kemetepa, a hepen-paae fóló, wisi wisi ala fea teteróló betere Doasi betere turu naase demó betalepó.

⁴ Atéturaalu, Kótóné a mulale doiné *ensel-rape* mulale doi teteró biture kaae, a soro betera alanékélé, *ensel-rape* soro betera ala mo bosenóló teraae falapó.

⁵ Ti noatepae, Kótóné i fo erapó.
 “Yata, yalo Naale betoo, e mió naao Aya alée foo, i dere ape.”

Me fo ipó.

“È, ama Alima betóo, a yało Naale betóo yaalopó,”
ere fo-a, mé *ensel*-paae yaleé?

⁶ Téró ai fo kaae, Kótóné ama topo naale betà i
haepaae dapesó wouraalu, i fo dapó.

“Kótóné *ensel*-rape fea a aomó sukóló bitu, ama
doi betà hale sóró horótu betae,” erapó.

⁷ Tépatei, Talené ama *ensel*-rapemó tuę muturaalu,
i fo dapó.

“*Ensel*-rape ama fo erale fópóló, besé tiki alée
falóo, ama kutó diratere whırape simi alée
falóo dua dapó,” erapó.

⁸ Tépatei, kale Naalemamó tuę mutu i fo erapó.

“Kótóo, naao so whı tetéróló kaae tare ala ke-
mekélé ini, hale yó tawóo, naao so whı
tetéróló kaae tawaaire alakélé, mo donoi
alané kaae tawóo yaalopó.

⁹ Naao hosaa mo donoi alapaae muóo, dowi ala ya
mo hýyóo yalepó.

Atéyaleteiné, ya tetéróló kaae tare Kótónétóro
ya mo taoró beteróturaalu, naao fulumu
whırape ti ya aomó beterópóló, haj faane
wel weı naao topomó suniyóló, ya sóró
beteralepó,” erapó.

¹⁰ Tétu, ama i fokélé dapó.

“Tale-ó, mo take keké nale alimó bete kaayóló
fótuku mulóturaalu, haeró şatamo naao
naasenétóro alerapó.

¹¹ Ai aleyóló muló betere ęla feata, doyóló
aluyaalotei, ya ti hale betó tarapó.

Ai ęla ęla feata, deróló sókó fatere kuti
derąakele yóló turukó fu dere kaae, doyóló
mo ti kemeyaalopó.

12 Whjné deró betere derꝥakele kuti sokóló ó me ɔla bopetu dere kaae, mió i ere sꝥaró haetamo naao bopée sóró, kuti kisi kae derótu dere kaae, kisi sꝥaró haetamo aleyóló mulaalopó.

Téyaalotei, yaṭa ai ere kaaetóró haḷe betó taru, bitiré faaire ba fo mo kemekélé yaalo meipó,” erapó.”

13 Me fo i ape.

“Naao bóe whjrape fea yaḷo dóló tꝥeteróló, naao hó aomó beteraaire be de sókó wópóló, ya yaḷo turu naase eró betere tikimó kaae tawóló betae,”

ere fo-a, Kótóné mé *ensel*-paae yaleé?

14 Ti *ensel*-rape feata, Kótóné kutó diróturaalu, mo ti betaaire so whj tao sene fae yóló, dotꝥyale keperape meié?

2

Wisiyóló kaae taru, kale fo wisi wosae ere fo

¹ Térapa, da feané wosale mo bete mole fo keteróló, da kópaae faqsóró ai fo kutiri mulóló, mo hotowaró kaae tawaalopóló i dere ape.

² Ti noatepae, mo take Talené ama fo so whjpaee yó melale fae yóló, *ensel*-rapepaaepi melalepó. Me whjnétaamo ai fo tikitepa, ó sya feni hꝥratepa, ti ai whjpaee dowi kwia mo donotóró mótua yalepó.

³ Mió danékélétamo Talené doasi tao sere ala keteróló, haḷe ɔla kaae aꝥratepa, ti daḷkélé netéro haꝥsókó faaloé? Ti ai doasi tao sere alata, Talené amatóró folosóró so whjpaee yalepó. Ai fo wosale so whj atimanémo, mopóló daḷpaae diriyóló yó melalepó.

⁴ Ai wh̄irapené yó matere fo mopóló tué tiki tirópóló, atimané yó male fotamo touróló kótóné, me ala yaairemó eratere alarapekélé, kolóló sir- atere alarapekélé, kae kae kelemei alarapekélé fea eralepó. Atéturaalu, Kótóné ama kisipa mole ala sya fóló, Dēi Kepe Wisiné h̄ale matere alakélé atimamó dok̄oróló mo s̄uralepó.

Yesu ą ama no nerape kaae alée fele fo

⁵ Take nalopaae ą bit̄i faalopóló i bopetu betere tikita, *ensel*-rapepaae t̄eteróló kaae tawae inipó.

⁶ Té̄patei, Talené fo as̄ere tuamó wh̄i mené etei kaae fo erapó.

“Mo wh̄i-a, noa kaae doasi bete mupa ąpaae kisipa mutu betere?

Wh̄iné naalemakélé hosaa muóló kaae tare-a, ą noa doi mole wh̄i betepa de?

⁷⁻⁸ Naao ą i haemó beteralesukamó, *ensel*-rape ąmó beterópóló yalepó.

Té̄yaletei, doasi doi mole alaró, mo kae ere ą̄ wisinaaletamo ąpaae eróló, ą sóró ho- ralepó.

Téturaalu, fea ala amatóro t̄eteróló kaae tawópóló, naaotei eralepó,” erapó.

Kótóné ai alarape fea ama t̄eteróló kaae tare ąmó mulaletei, mo bet̄akókélé h̄ale munipó. Atére ala mió ą̄ané kelené kilinipó.

⁹ Té̄patei, Yesupaae eró betere ala kisipa muae. Taketa, Talené *ensel*-rape ąmó mo sawa sukamó beteraletei, ama tikimó susupu sóró suk̄ale betené, mió Talené ą topo wh̄i beteróturaalu, doasi doi mutere alaró mo kae ere ą̄ wisinaaletamo ąpaae eró betepa kelerapó. Aita, Kótóné

hamokoróló hãle tao sere ala d̄apaae eróturaalu, sukutere ala d̄apaae waqsóró, mo turó ama tikimótóró serapó.

¹⁰ Kótó ąta fea ala bete tale bitu, fea ọla ọlané ama kisipa mole alatóró erópóló, aleyóló muló beterapó. Atére sekéné ama mo dekéro betó mole naale senaale aluni, mo kae ere d̄e tuapaae ąlisóró faaire wh̄i Yesu ą mené dóló sukunópóló yalepó. ą atéro sek̄e siré fóló, asane feleteiné so wh̄i tao saai mo s̄ure topo wh̄i beterapó. Ti Kótóné ąpaae ai eró betere ala fea d̄ané kilituraalu, mo dono ala erapóló kisipa mutapó.

¹¹ Me alatamo hosekényi, Talené ama kae betero betere so wh̄iró atima fokóló kae beteratere sek̄etamo, Kótóné mo bet̄a faketóró aleró bettereiné Yesuné atimapaae no nerape-ó yaaire ą hale dumipó.

¹² Ama i fo dapó.

“Yalo no nerapené naao doi tué yópóló, yalo h̄akeamó yóo, touró betere so wh̄i feané keletómó naao doi sóró horóturaalu, wole fokélé yóo yaalopó,” erapó.

¹³ Me dere fo i ape.

“Yalo ąpaae tué tiki tiraalopó,” erapó.
Ai fo kaae ama momó dapó.

“Ękélé, Kótóné ama ępaae melale naale senaalekélé, d̄a fea i betere ape,” erapó.

¹⁴ Ti Kótóné ąpaae kaae tawae yóló melale naale senaaleta, mo hae wh̄itóró bettereiné, ąkélé atima daale mo tikitóró alée felepó. Aita hãle mei, sukutere fotok̄o bete tale Satan doraai yalepó.

¹⁵ Tétu, sukaosóró witere alané wae sóró dokóló muló betere so whị ả sukuturaalu, teraayóló hãle fópóló eralepó.

¹⁶ Ti ama ai ere doasi alata, *ensel-rape* tao saai ini, Abraham-né deté fele naale senaale tao saai yalepó.

¹⁷ Atére betené Yesu ả Talené ala eróturaalu, so whị kolené sukóló, tao sóró momaratero topo whị bitu, so whịné du betale dowi alamó, Kótóné atima kwia melaosóró sesé yaairaaalu, ả ama no nerapené daale tikitóro alée felepó.

¹⁸ Ti noatepae, sụ sere alaró kae kae susupui alatamo siré fóló mo asareteiné, mepaae so whị dowi ala yópóló sụ sere sukamó, atima dée naosóro ama mo sụmó tao senérapó.

3

Yesuné Moses tẹteró beterapó ere fo

¹ Térapa, dowi ala fokóló kae beteró betere no nerape-ó, ảkélé ảkélé Kótóné hepen bepaae faai ape yóló mo betạ kaae fotóro erapa, ảnéné tuệ tiki mo turó Yesupaaetóro muló betae. Ti ảta, Kótóné ama fo yó melópóló doteyale whị betóo, ảmó momaratero topo whị betóo erapóló ảnéné i du betere ape.

² Moses-né Kótóné ama fake so whị mo wisiyóló kaae taru yale kaae, Yesunékélé ả sóró beterale sekéné ảpaae erae yale ala fea mo turó eraté fu betalepó.

³ Betạ be tẹtere whịné be wisinaale tẹpa, so whịné ai be siratua dapó. Tépatei, ai be tẹyale whị dukiratero foné be wisinaale tẹnapóló, siratero

ala teteró beterapó. Atétu dere kaae, Yesuné doasi doi mole alané Moses-né doi muale ala, mo bosene falapó.

⁴ Be fea tēnetei ama kōleaané daani, whīné tēyóló mulótua erapó. Atére kaae, ọla ọla fea Kótóné amatóro aleyóló muló beterapó.

⁵ Ti Moses ọ Kótóné kutó diratere whī bitu, Talené so whī mo wisiyóló kaae taté fu bitipakalepó. Tétu, ama du betere alata, take nalopaae Talené mo eraalopóló, ama hakearóló yó mótu bitipakalepó.

⁶ Téyaletei, Keriso ọ Kótóné naalematóro bitu, Talené ama fake so whī fea mo hotowayóló kaae taté fu beterapó. Atétu, take nalo waaire be demó Talené dapaae wisi ala eraalopóló, haitamo kaae taru, halaainé ama ala hāle eró tapa, ti dā Kótóné ama fake so whītóro beterapóló kisipa muae.

Kisipa tirénire so whīpaae wisiyóló kaae tawae ere fo

⁷⁻⁸ Atéreteiné Dēi Kepe Wisiné i fo dapó.

“Whī bitini hāle kópu kaae fi tikimó, Kótóné diaaọ noutererape sū sóró kaae kelalemó, ama dere fo woseni, dowāae fóló hosaa tẹ ipakalepó.

Atéyale kaae, mió diaaọkélé ama fotamo wosetepa, diāné hosaa tẹ yaọsóró yae.

⁹ Diaaọ noutererape atima atéro kuturaalu, 40 ba fo tuamó ẹ kaae kolóló sū siré fu betepa, yało erótu betale ala atimané kilitu betalepó.

¹⁰ Atéyale betené ai alimó betale so whītamo fopaae butu, yało i fo yalepó.

‘Atimané hosaa mo turó kae tikipaae murlaalu, yało erótu betere ala mo tuékélé inipó,’

¹¹ Atétepa, ę fopaae butu etei dirii fo yóló mulalepó. ‘Yało hosaa muni deyóló dua betere ala tuamó, atima sókókélé mo waalomeipó,’ erapó.

¹² No nerape-ó, diakó mepaae whiné hosaa tuamó mole dowi alaró, mo ti betere Kótópaae tué tiki tirénitere alatamo iru, Kótó taaróló faqsóró, hotowaró kaae tawae.

¹³ Téturaalu, miópó du betere be de kemeyaaiepatei, dowi alané dią dilikóló diaaę hosaa ąaraqsóró, betere dokę diąsisi ketekę u bulótu i bulótu du betae.

¹⁴ Folosóró kaae suraalu, dané tué tiki tirale ala tuamó taaréni, mo diriyóló bitiré fóló, kemene fole kwiamó sókó fupa, ti Keriso tuamó mole ala danékélé serapó.

¹⁵ Kótóné ai fo ereteiné dané u deté wale fo momó i dere ape.

“Whi bitini hałe kópu kaae fi tikimó, diaaę nouter-erapené Kótóné dere fo woseni, hosaa ąayóló dowaae fu betale kaae, mió diakélé ama fo wosetepa, diaaę hosaa ąa yóló dowaae faqsóró yae.”

¹⁶ Talené atimapaee yale fo wosaalo hýyóló dowaae fele so whi-a, deé? Aita, Isip hae taaróló, Moses-né dapesó fele so whitorótipó.

¹⁷ 40 ba fo tuamó, Kótóné fopaae bualetei-a, detamo maaté yaleé? Aita dowi ala yaleteiné kópu kaae fi tikimó, hałe sisiraae fele so whitorótipó.

¹⁸ Kótóné ama dirii malo duraalu, “Yalo hosaa muni deyóló dua betere tikimó, atima betakókélé mo sókó waalomeipó,” ere fo depaae maaté yaleé? Aita, ama fo tikitu betere so whıpaetóró erapó.

¹⁹ Ti atima Kótóné dua betere ala tuapaae sókó fenire beteta, Kótóné fo wosóló, tué tiki tiréni yaletiné erapó.

4

Kótóné so whı s̄a nópóló tukóló muló betere be de mulapóló ere fo

¹ Ti Kótóné ama so whı s̄a nóló bitı wópólópó ere fo kemeni, hale mulapó. Atérapa, ai tuapaae bitı faairetei da hasókó faqsóró, witamo hotowaró kaae tawae.

² Ti noatepae, mené atima Juda fake so whıpaae yó melale fo wisi dapaaekélé yó melalepó. Atimané ai fo wosóta yaletéi, mopóló tué tiki tiréni yale betené atima tuamó me dukélé olenipó.

³ Ti ai fo mopóló mió tué tiki tiró betere so whı da, Kótóné ama s̄a nokole tikipaae sókó fu beterapó. Tépatéi, kisipa tirénire so whıpaae Kótóné i fo erapó.

“Atétepa, ę fopaae buturaalu, etei dirii fo yóló mulalepó. ‘Yalo s̄a nóló betere tikipaae atima wóló betókélé mo yaalomeipó,’ ” erapó.

Take Moses betale alimó Kótóné ai fo mo epatei, s̄aró haetamokélé, ere ęla ęlakélé, fea Kótóné ama aleyóló kemerélipakalepó.

⁴ Ti noatepae, weıke be demó Kótó ę s̄a nale fo mepaae ase tuamó eretei dosatepa tuénérápó.

“Kótóné ama diyale kutó fea kemeróló, weıke be demó ti ę s̄a nalepó,” erapó.

⁵ Kale yale fo momó i dapa, wosae.
 “Atima yało şa nóló betere tikipaae wóló betókélé
 mo yaalomeipó,” erapó.

⁶ Atére betené mió mepaae so whı şa nóló
 betaalopóló, i bopetu betere tuamó sókó fóló
 betenérápó. Ti take betale so whı Talené fo wisi
 mené yó matepa wosetua yaleteti, ai fo aqmó
 sukóló bitini, tikitu betaletiné şa nóló betere ala
 tuapaae sókó fenipó.

⁷ Atéro bitiré fóló, mepaae ba forape keme
 itikimó, ti Kótóné be de kae dałe mulóló, miópó doi
 mulóturaalu so whıpaae i fo yae yóló, Depit-paae
 ipakalepó.

“Mió ama fotamo wosetepa, ti diaağ hosaa taýóló
 dowaae fu betaqsóro yae,” erapó.

⁸ Ti noatepae, Josuané Talené so whı şa nalóló
 beteroluşasóro, ti nalo me be demó Kótóné şa nóló
 betaalopó fo uameipó.

⁹ Atérené Kótóné ama kutó kemeróló a şa
 naleteita, take ama so whı şa nóló beteraaire
 alamó kisipa mutu ereteiné, diğ ai şa nóló betere
 ala tuapaae biğ fenérápó.

¹⁰ Ti noatepae, Kótó a ama kutó diyóló kemeróló,
 şa nóló bitu yale kaae, mepaae so whı de Kótóné
 şa nóló betere tikipaae sókó fupa, ti so whıkélé
 atimané ditere kutókélé taaróló, şa nóló hałe
 betenérápó.

¹¹ Atérapa, atima Kótóné fo tukóló dowaae fu
 betere ala sya furaalu, dağkélé dee naqsóro, ai şa
 nóló betere tikipaae ketekę buóló sókó faalopa
 siępe.

¹² Ti Kótóné fota, betero betere fotokqtamo
 faayóló mo şurapó. Ai fota, tamo fakeró fosó daale

bóe dele sepakené fosókélé mo teraae falapó. Atéru, whíné asoró kepetamo tuámó tekeyóló sonaae fóo, diri tamo olekereteikélé tuámó tekeyóló sonaae fóo, dua dapó. Atérené whíné hosaa tuámó ere alaró mole tué tikitamo, Kótóné ai fonétei kaae kolóló talenérápó.

¹³ Kótóné aleyóló muló betere ọla ọla fea ama keletómó hiró bitini, mo fopa haķeamó mulapó. Atére sekéné keletómó, dané du betere ala fea mo betakélé hiraalomeipo.

Yesuta Talepaae momaratere topo whị beterefo

¹⁴ Dá tao sóró momarótu betere doasi topo whị Kótóné naalema Yesu ọ sá tuámó fóló hepen-mó beterefo, ama fo wisi dané wosóló mopóló ọpaae tué tiki tiratere ala taaréni, mo ti tiró betae.

¹⁵ Ti dąta, mo hae whị beterefeiné mepaae seķei ala ó dowi ala yópóló sụ supa, diriyóló daayaaire fotokọ mo bunipó. Tépaitei, damó momarótu betere topo whíné ai alarape fea ama hosaamó suraalu, dą tao senérápó. Ti mió dąpaae i wou betere seķe ó dowi ala yópóló, sụ sere ala fea ọpaaekélé wua yalepó. Téyaleteti, ọ dowi ala mo betakélé inipó.

¹⁶ Atérapa, dąpaae seķei ala wale sukamó dą kọleturaalu, ama tao sópóló hamokoróló hąle tao sere ala tẹteróló kaae tare tikipaae faaire wini, halaainé faalopa siépe.

5

¹ So whimó Talepaae momaratere topo whị sóró beteraai, whịrape fea fopeyóló betą whịtóró sóró

beterótua dapó. Ai whíta, so whíró Kótótamo tuámó bitu, so whiné yale dowi ala Kótóné tokóló alurópóló, simó sukúlaa dalatere alaró hãle matere alatamo dua dapó.

² Ti kóló kólóru, kópaae fole so whi dã tao saai ai tuã whi ãkélé hae whítóro ereteiné naameyóló mo dua bitu enérapó.

³ Ti ãkélé dowi ala dere whi beterapóló kisipa mutu, ama yale dowi alapi Talené wisirópóló, simó sukúlaa dalóo, nalo ti mo so whiné dowi ala wisirópóló sukúlaa dalóo, dua dapó.

⁴ Mepaae whi momatere topo whi betaai doi sere alata, ama kọleaané enénitei, Kótóné Eron-paae ape yóló momaratere topo whi sóró beterótu yale kaae, Kótónétóro ai whi sóró beteranérapó.

⁵ Atére kaae, Keriso ă doasi doi saai kisipa mutu, amatei momaratere topo whi bitinipó. Téni, Kótóné ăpaae duraalu,

“Yãta, yãlo naalepó. Ẽta, mió naao aya alée fulapó,” erapó.

⁶ Ai fo kaae, me asę tuámó i fo dapó.

“Melkisedek ă momaratere whi bitu deté fele ala naao tẹteróló kaae taru, momatere ala hãle yó taté fu beterópóló, yãlo yã sóró i beteratere ape,” erapó.

⁷ Yesu i haemó bitiré fele sukamó, ă sinaqsóro tao saaire seképaee me sukamó ă wole yóo, me sukamó ă tao sae yóló moma fakeyóló yóo dua yalepó. Ẽ atéro Tale aqmó sukóló betaleteiné ama erae yóló kematere moma Kótóné wosóló, mo eralepó.

⁸ Ti ą Kótóné naalema bitutei, seke hąle beleté feleteiné Kótó aqmó sukóló betere ala mo asane felepó.

⁹ Ai ala deté fóló, ą momaraterer whi wisi biti felepó. Atétu, ama fò wosóló eraterer so whi fea aluni, mo ti betó tanópóló, tao su betere bete tale alée felepó.

¹⁰ Ti aita hąle mei, Kótóné ąpaae duraalu, “Melkisedek-né deté fele ala tuqmó ya momaterer whi beteratapó,” yale betené yalepó.

Talené ala taaróló sisópaae eratepa mo wió yae dere fo

¹¹ I bopeyale alarape dekéro moletei diąpaae uqmó, ai fo bete diaaq wosaaire hapólureteiné, diąpaae yaairekélé dirirapó.

¹² Ita mo fo dapó. Dią mo take kaae sóró Kótóné ama bete mole fo woseté waletiné, mió dią Kótóné fo yó materer whirape mo sumó bituapó. Até uątei, ama bete mole fo dią tuę inipa, take kaae sóró yó malepaae fesaae fóló, mené dią momó yó manérápó. Dią dirii ąla naaire suni, keteirape mo awatóró naai ekęletu dere kaae erapó.

¹³ Mepaae so whi de awatóró ekęleyóló nuku betepa, ti ai so whi mo ketei kaae bitu, Kótóné mo donoi ala eratereter tuęni, kóló kólórapó.

¹⁴ Tépaterei dirii ąlata, disire so whiné nópóló muló beterapó. Atére so whi ti Talené fo woseterer dokę fea ama alatóró eró tareteiné asa duraalu, dowi alaró wisi alatamo sumó kaae kolóló, tal-enérápó.

6

1-2 Atére betené Kerisoné ala i ape yóló, teómó kaae suraalu, yó matere fo momó kae yó melaalomeipó. Até yaleteti taaróló, mió mo dirii fo diãpaae i dapa wosae. Take kaae sóró yó melale fota, wh̄irapené be t̄eteróturaalu, folosóró iru eleké detu dere kaae yóló, yó male alarape i ape. Sukutere alapaae alísóró fole dowi ala taaróló, t̄u wisipaae fole alakélé, Kótópaae tué tiki tiratere alakélé, w̄ei tópuratere alakélé, me wh̄i Talené kutó dirópóló, ama tikimó naase mulatere alakélé, sukutere so wh̄i kepaayóló betaaire alakélé, so wh̄i feané yale ala taleyóló mo ti muó tawaaire kwia melaalopó ere fokélé, take folosóró kaae suraalu yó maté waleteti, momó kae yó melaalomeipó.

3 Kótóné wisirapa, dirii fo yó melae depa, ti d̄ané mo yó menanérápó.

4-6 Mepaae so wh̄i atima diliki tuãmó beteretei taaróló, d̄e tuãpaae bit̄i f̄oo, hepen bemó mole wisi wisi ɔla atima sóró asa yóo, D̄ei Kepe Wisiné erótu betere alakélé atima sóo, Kótóné bete mole fo tuãmó bole wisi ala atima kisipa yóo, take waaire alimó t̄eteróló kaae tawaaire fotokókélé atimané tué yóló asa yóo ere so wh̄itei, Talené ala taaróló fupa, ti momó kae kisipa feteyóló fesaae wonénipó. Téturaalu, atima ai du betere alané Kótóné naalema so wh̄i feané keletómó doasi hale seróló, ɔ filipaa ni tómó momó oleratere aɔrapó.

7 Hali wouraalu, wisi f̄e bulatere haemó ɔla wisiyóló holóló, ai kutó talené ɔla supa, ti ai hae tiki Kótóné wisiraalopó.

⁸ Tépatei, ɔla wisiyóló huni, mu daai képiró dowi netamo hotere hae ti fe buni, dowi deké bulapó dua dapó. Atére haeta, ai kutó talené doróló, kemeróturaalu simó néli biliyaalopó.

⁹ Dəné hosaa mole no nerape-ó, i deté wale fota, diə tuəmó ere alámó dumipó. Ti diəta, Talené ama so whi aluyaosóro tao sale ala tuəmó betere ala dəné kisiparapó.

¹⁰ Ti Kótó ɔta, so whi feané du betere alarape hɔko taleyóló kwia mótumipó. Atérapa, diaaɔ ama kutó diratere alakélé, Kótó ɔpaae yaala sókó furaalu, ama kae beteró betere so whi tao sere alakélé, nalo tao siré faaire alakélé, fea ama tué yó taru, kwia mo donotóro melaalopó.

¹¹ Talené diə dokɔ feapaae melaalopó yale ɔla mo saasepólópa, ketekɔ buóló mió diaaɔ ai du betere alatóro həle yó taté fóló, kemene fole kwiamó sókó fae.

¹² Diə Kótóné ala erótu beteretei deka yóló taaréni, mepaae so whi atima tué tiki tiratere alaró sekei ala wapatei, həle yó tare alatamo su beterapó. Diəkélé ai ala yaasepóló, atimané dere alatóro sɔróló yae.

Kótóné eraalopó dere ala həsókó fəni mo eraalopó

¹³⁻¹⁴ Kótóné ama eraalopó yóló mulale fo Abraham-né mopó yópóló, Tale ɔ tɛteró betere Doasi me bitinipa, amatei ɔ doi yóló dirii malo duraalu,

“Yəlo yə wisiratereteiné, naao detere naalené deté fole naale senaalekélé doakale fake firatere ala həsókó fəni, mo yaalopó,” ipakalepó.

15 Atétepa, Abraham ą whaaliani, dua kaae taté fóló, nalo Kótóné ąpaae melaalopó yóló mulale ąla mo salepó.

16 Me whinė mepaae so whıpaae i ala eraalopóló mulatere fo diriróturaalu, atimané doi yóló dirii malo dumi, atima teteró betere doasi whiné doi yóló, ó Talené doi yóló malo dua dapó. Atéró dirii malo dereteita hąle mei, nalomo ai fo inipóló foné u só derótu, i só derótu yaqsóro dapó.

17 Ti Kótóné ama eraalopó dere fo diriróturaalu, amatei ą doi yóló dirii malo yaleteita hąle meipó. Ama ai eratere ala saaire so whinė ama yóló mulatere fo kisipa feteyóló taaréni, mo dokonatapó kisipa muópóló yalepó.

18 Ti Kótóné ama eraalopó yóló mulale foró dirii malotamo epatei taaróló, ama kisipa feteyóló me kae ala eranénipó. Kótóné ai ala yaleteita hąle mei, ą dowi alamó kwia sóro aluyaqsóro, Talené tao sóro mo wisiyóló beteraalopó yale fo wosóló hosaa tuąmó muló bitu, tuę tiki tiraté fu betere so whı ą ketekę buópóló yalepó. Ai so whıta, ti ąatóró i ape.

19-20 Take nalo ą mo wisiyóló betaalopóló hąitu betere ala mepaae sekę ó whaalıa dere alané só deróló doraqsóro, ai hąitere alané ą diriróló, turuku kaae derapó. Ai turukuta, hąko tikimó dini, satąle yóló kuti oleró betere tiki bosenóló, Kótóné mo kae aleyóló muló betere be ke tuąmó erapó. Ai be ke tuąpaae so whı nalo wópóló, ą tao seré whı Yesu ąpi folosóro sóro falapó. Ai sekęta, Melkisedek betale kaae, so whımó momaratere topo whı alée fóló, ai ala hąle deté fu beteraapó.

7

Melkisedek momaratere topo whi betere fo

¹ Ti Melkisedek ata, Salem be hulua teteroló kaae tare topo whi betoo, mo taoró betere Kótópaae momaratere whikélé betoo, ipakalepó. Abraham a mepaae topo whirapetamo bóa fóló, bóa whirape dóló kemeroló momó fesaae wouraalu, tumó Melkisedek-tamo hokolaa yóló, Abraham wisiraterere fo erapó.

² Atétepa, Abraham-né ama bóa dóló sale ọla ọla naase tamo moletei dekeyóló, betá Melkisedek-mó melalepó. Melkisedek-né doi bete tamo mulapó. Folosóro doiné bete, “Donoi ala dere topo whipó,” Me doi bete, “Salem be hulua teteroló kaae tare topo whipó,” Ai doi feteyóló, “Hosaa muni deyóló dua betere ala teteroló kaae tare topo whipó,” erapó.

³ A deyale soró whitamóné doikélé, a kaayale noutererapéné doikélé, a deyale be dekélé, sukále be dekélé, asemó muni, Kótóné naalema biture kaae, a so whimó momaratere topo whi hale betó tarapó.

⁴ Ai seké a doasi whipóló ere ala tué muae. Dané noutere Abraham-nékélé ama bóa dóló sóro wale naase tamo ọla ọla dekeyóló betá Melkisedek meló beterapó.

⁵ Kótóné ama tukóló muló betere fo tuamó i ala yae erapó. Lipai fake whirapekó so whimó momarópóló sóro betero betere whirapéné mo so whiné mole naase tamo ọla ọla dekeyóló, betá siré kweyae yóló munélipakalepó. Ti atéro kotere whirapekélé, matere so whikélé, atima

fea Abraham-né deté fele fake no nerape epatei, atima tuamókélé siré kweipakalepó.

⁶ Melkisedek-ta, Lipainé deale whi meitei, Abraham-né naasetamo ɔla ɔla dekeyóló betá ɔ melalepó. Aṭa, Kótóné wisi ala eraalopó yóló mulale whitei, ai ɔla ɔla matepa sale seké Melkisedek-né ama foné ɔ wisiralepó.

⁷ Ita mo dua dere alapó. Doasi whiné ɔ aomó betere whi ama foné wisirótua dapó.

⁸ Atétere kaae, so whiné naase tamo ɔla ɔla dekeyóló betá siré fu betepatei, ai whirape suku-tua yalepó. Atéyaletei, kale doasi whi Melkisedek-né naase tamo ɔla dekeyóló betá ama saletei, ɔ sukalepó fo munipó.

⁹ Mené etei kaae fo sumó enérapó. Naase tamo ɔla ɔla moletei, betá dekeyóló siré kotere whi Lipai ɔ Abraham tuamó, ni du ke kaae bolepo. Atépa, Abraham-né ɔla ɔla dekeyóló betá Melkisedek-mó matepa, Lipainé amakélé meló beterapó.

¹⁰ Ti Melkisedek-ró Abraham-tamo hokolaa yaleteita, Lipai ɔ deyaai ama tikimó teó bupa yalepó.

Melkisedek momaraterere whi betale kaae, Yesukélé momaraterere whi betó tarapó

¹¹ Lipainé deale whirape mo so whimó momaterere topo whi betere tuamó Kótóné tukóló muló betere fo sókó walepó. Tétu, atima ai alimó momarótu betale alané Kótóné so whi mo ti wisiróluasóro, momaraterere topo whi me kae waalopó fo uameipó. Ti ai momaraterere topo whita, Eron-né deale naalené deté fele whi mei, Melkisedek bitu yale kaae du betaalopó, erapó.

12 Ti noatepae, mo so whimó Talepaae momaraterere whirapené du betere ala taaróló, Talené me kae alatamo tukóló mulatepa, ti ai ala sumó enérapó. Meitepa, ti enénipó.

13 Ai ere fo dokonó betere whita, Lipai fake mei, kae fake whipó. Ai fake mo betanékélé so whimó Talepaae simó sukulaa dalóló, momatere ala inipó.

14 Dá teteróló kaae tare whi Yesu a Juda fakené dealepóló, so whi feané kisiparapó. Ti betá Juda fake whikó so whimó momaraterere topo whi beaalopóló Moses-né asémó inipó.

15 Melkisedek betale sirimó, whi me kaetamo sókó hotepa, ti dané i deté wou betere fo bete mo hakearatapó.

16 Ti noatepae, ai whi a so whimó Talepaae momaraterere topo whi sóró beteraleteita, Lipainé deté fele whirape maaté sóró beteranérapó, ere fo sya furaalu inipó. Ai seké a tuámó doasi fotokó bulu, mo ti betó tareteiné dóló sukunaaire sunipa, Talené a momaraterere topo whi sóró beteralepó.

17 Ti ai fo kaae me asé tuámó i fo erapó.

“Yata, momaraterere topo whi Melkisedek-né du betale ala naao teteróló kaae taru, yó taté fu beterópóló, yalo ya sóró beteratapó,” erapó.

18 Kale folosóró yóló mulale fota, me ala yaaire suni bépa, hale ɔla kaae aqróló taalatapó.

19 Ti noatepae, kale tukóló muló betere foné so whiró Kótótamo betámó wisiyóló beterópóló, mo turó wisiranénipó. Kale folosóró yale ala taaróló, mió Talené ama so whi wisiyóló beteraalopó ere foné betá Kótó betere felekepaae alisóró fenérapó.

20 Ti ą momatere whi s3ró beter3turaalu, dirii malo y3l3 s3r3 beteralep3. T3yaletei, mepaae momaratere whirapeta, h3le fon3 maat3 s3r3 beter3tua dap3.

21 T3yaletei, K3t3n3 i sek3 momaratere whi s3r3 beter3turaalu, ąpaae i malo yalep3.

“Talen3 ama kisipa feteyaalomei, y3 so whim3 momaratere whi mo ti bet3 tan3p3l3, y3lo y3 s3r3 beteratap3,” erap3.

22 Ti at3r3 dirii malo yaletein3 Yesu ą K3t3n3 ama so whi tao saalop3l3, y3l3 mulale fo diriraterete al3e felep3. Ama so whi tao saalop3l3 kisi y3l3 mulale fon3 folos3r3 yale fo teraae falap3.

23 Ti mo so whim3 momaratere whirape dek3r3 bitir3 walet3i, ai whi sukutepa, me whin3mo t3ter3l3 kaae tatua yalem3, ai whirapek3l3 fea sukutua yalep3.

24 T3yaletei, Yesu ą mo ti bet3 taretein3, so whim3 momar3tu betere ala h3le y3 tat3 fu beterap3.

25 At3ren3 K3t3tamo bet3m3 betaai kisipa mutu, Yesun3 ama yale ala tu3m3 fu betere so whi mo ti beter3p3l3, Yesun3 ama mo s3m3 tao sen3rap3. Ti noatepae, ąta so whir3 K3t3tamo tu3 whi bitu, K3t3paae atima tao sae dere fo h3le y3t3r3 tarap3.

26 Yesu ą at3r3, momaratere topo whi bitu, d3 y3y3re ala fea ama mo s3m3 tao s3r3 eran3rap3. Ti ąta, K3t3n3 mo kae beter3 beter3tein3 men3 ą s3 deraaire bete muni y3o, ą me dowi alatamo hosek3ni y3o, dowi ala du betere so whitam3 bet3m3 bitini, kae bet3o, 3 s3r3 hepen betamok3l3 fea amat3r3 t3ter3l3 kae taw3o erap3.

²⁷ Mepaae momaraterere topo wh̄irape betere dokɔ fea atimané dowi alapi kemerópóló, *sipsip* o *bulmakau* hupu simó sukɔlaa daróló, nalo ti mo so wh̄iné dowi alamó sukɔlaa dalaterere ala suka fea h̄ale yó taté fu betera. Atima ai dere ala kaae, ɔ tuamó me noa dowi alakó mupa atéyaaloé? Ti ama betere bete Kótópaae mo betɔ félimótóró melóló, mo so wh̄iné dowi ala kwia ama tokóló aluróló wisiralepó.

²⁸ Ti kale tukóló muló betere fo sya furaalu, mo hae wh̄itei, momaraterere topo wh̄i sóró beterótua yalepó. Téyaleteti, nalo sókó wale dirii malo fo tuamó ti Talené naalema momaraterere topo wh̄i sóró betera. Ai wh̄i ɔta, me alakélé mo yaɔani, so wh̄i tao sere alatóró h̄ale yó tanópóló, Kótóné ɔ mo turó suróló betera.

8

Yesuta momaraterere topo wh̄i bitu, mió kisi ere fo diriró betere Talepó

¹ Dɔné i deté wou betere fo tuamó bete mole mo topo fo i ape. Dɔ tao sóró momaraterere etei kaae topo wh̄ita, hepen bemó Doasiné t̄eteróló kaae tare tikimó, ama turu naase eró betere demó fóló betalepó.

² Take kaae sóró t̄eyale momaterere kuti bemó, Talené ama kae ere ala erótu betera. Ai beta, mo wh̄iné naasené t̄eni, Talené amatóró t̄enapó.

³ Ti mepaae mo so wh̄imó momaraterere topo wh̄irapéné Talepaae h̄ale matere alaró simó sukɔlaa dalaterere alatamo yópóló, Talené sóró beterótua dapó. Atétere kaae, mió dɔ tao sóró

momarótu betere sekékélé, Kótó beterepaae hałe faalomei, me ọla sóró ti sumó fenérapó.

⁴ Aṭamo i haemó bituṣsóró, ti so whimó momaraterere whi bituṣmeipó. Ti noatepae, Kótóné tukóló muló betere foné Talepaae hałe melae ere fo sya furaalu, mótua dere whirape sóró beteró beterapó.

⁵ Ai whirape atimata, ó hepen-mó ere mo ti momaterere be sūróló, i haemó tene mo kuti bemó Talené ala erótu beterapó. Moses-né ai momaterere kuti be tēyaaitepa, Talené ṣpaae i ma fo erapó.

“Naao ai be tēturaalu hoko tēni, dāmo hasi fósómó bitu, yalo yaṣpaae yó melale be sūtóró mo hotowaró tēyae,” yóló ipakalepó.

⁶ Téyaletei, Talené ama so whi tao saalopóló, yóló mulale dirii fo Yesu ṣ tuamó erótu beterapó. Atére kaae, i haemó mepaae momaterere whirapénékélé ai ala du beterapó. Tépatēi, mió kisi yóló mulale dirii foné take yóló mulale fo teraae falapó. Atére kaae, Yesuné Kótóné so whi tao sóró ditu betere kutóné atimané ditu betale kutó mo teraae falapó. Ti ai kisi dirii fo tuamóta, Kótóné ama so whipaae eraalopóló, mulale wisi ala faanuraalu, take yale ala mo hałe ọla aṣóró beterapó.

⁷ Ti noatepae, Talené take folosóró yale dirii fotamo mo sūrāpó uṣsóró, ti nalo ama eraaire me dirii fo kae uṣmeipó.

⁸ Tépatēi, Kótóné ama so whi fopeyalemó, mepaae ḥsókó fole ala kolóló i fo yalepó.

“Ḙta, Talené i dapa wosae. Take waaire ba fomó Israel so whiró Juda so whitamó yalo tao saai, kisi dirii fo kae yóló mulaalopóló diṣpaae i dere ape.

- ⁹ Ti mió yalo kae yóló mulaaire kisi dirii fota, take atimané noumatererape Isip hae kwiamó betepa, yalo dapesó wale sukamó, yóló mulale dirii fo kaae meipó. Atimané yalo yóló mulale fo sya fóló eró tanitepa, yalo atima tao saai yaleteti taaróló, sisópaae eralepó.
- ¹⁰ Eta, Talené i dapa wosae. Ai ala yóló k̄lipaae Israel so wh̄itamo yalo etei dirii fo yóló mulaalopó. Yalo tukóló mulatere fo tikaqsóró, atimané tué tiki tuamó mulóo, hosaa tuamókélé aseýóo yaalopó. Téturaalu, ę atima t̄teróló kaae tare Kótó betóo, atima ti yalo so wh̄i betóo yaalopó.
- ¹¹ Atétere alimó, me wh̄iné ama be wh̄i so wh̄ipaae ó ama nomapaae duraalu, ‘Tale tué muóló betae’ dere fo momó kae yaalomeipó. Ti noatepae, ai be demó mepaae sókó deyóló betere so wh̄inékéle, doasi doi mole so wh̄inékéle ę mo tué yaalopó.
- ¹² Atétepa, yalo k̄leturaalu, atimané du betere sonaalei alaró mepaae dowi alatamomó, kwia melaai yaleteti yalo kisipa keteróló aluraalopó,” erapó.
- ¹³ Ti Talené ama i yóló mulaaire dirii fota, “Kisipó” doi mulóturaalu, take folosóró yóló mulale dirii fo bete muni h̄ale ęla kaae aępa, kisi foné mió mo felekemó kemeróló aluraai dapó.

9

I haemó kapala tene kuti bemó momatu betere ala

¹ Take folosóró diaaq noutererapepaae Talené ama ala eróturaalu, ępaae momatere alakélé etéró

yae yóló yó melóo, ama ala eraaire momatere bekélé etéro tɛyae yóló yó melóo, ipakalepó.

² Atétepa, so whiné Talepaae moma yaairaalu, kuti be tɛyóló, u tuámó be ke tamo aleyóló munélipakalepó. Folosóro sókó fole be ke ti arai kutiné satale erepó. Ai be kemó ti *lamp* sa daalóo, ɔla mulatere ni fakeró Talené keletómó mulótua dere *bred* otamo muóo erepó. Ai be kené doita, Kótómó kae tukóló muló betere tikipó.

³ Me aleyóló muló betere be keta, hapólui kutiné satale erepó. Ai be kené doita, Kótóné ama ala beta eraai mo kae tukóló muló betere tikipó.

⁴ Ai be ke tuámó felé kɛlaa wale fetera kaae ɔla biliyaaire tiki *kold kapané* aleyóló daalóo, Kótóné ama so whipaae wisi ala eraalopóló ere dirii fo aseýóló buló betere *bokis-kélé* mulóo erepó. Ai *bokis* husiróló *kold kapa* datekaró betera. Ai *bokis* dolomó, *kold kapané* aleale wutimó *mana* o deróló mulóo, Eron-né dotó tiki asɛ sokoretei mulóo, Kótóné dirii fo asɛre kane fake tamokélé bulóo erepó.

⁵ Ai *bokis* tómó, Kótóné ama mo kae ere de faane *serupim ensel*-rape suróló aleale ɔla me uté daayóo, me ité daayóo erepó. Ai *serupim ensel*-tamoné baase dorokó faróló so whiné dowi ala kemerɛleta dere tiki husiró beterepó. Atére alarape fea bete etérapóló, mió mo turó dané enénipó.

⁶ I bope yale ɔla ɔla fea atéro taleýóló muló betepa, mo so whimó Talepaae momaratere whirape folosóro ere be kemó, atimané ditere kutó diyaai, hutua yalepó.

⁷ Tétua yaleteti, mo u tuámó ere be kepaae ti so whimó Talepaae momaratere doasi topo whi ɔ

maaté betā ba fomó, mo betā félitóro fua yalepó. Téturaalu, ai be kepaee naase hāle feni, *bulmakau*-ró *meme* hupu sameatamotóro sóro fua yalepó. Atétua yaleteita, Talené atima kwia melaosóro seséturaalu, ama yale dowi alapi Talepaae melóo, nalo ti mo so whiné dowi alapóló tuēni, mo ala nisiyóló du betale dowi alamó melóo, dua ipakalepó.

⁸ Mió ai be hāle tēpa, Kótóné mo kae ala ere be tuāpaae sókó faaire tū hāle ai kinapa kelae yóló, so whīpaae Deī Kepe Wisiné hākearóló yó mótu betera pó.

⁹ Ti take Talepaae me ọla hāle matere alaró hupu simó sukūlaa dalatere alatamoné ai ọla sóro wale so whiné hosaa tuāmó mole sekēi ala mo ti wisiranénire ala mió i alimó betere so whiné tuē yópóló, hākearóló yó matapó.

¹⁰ Atéroró, ọla nokole alakélé, wēi nokole alakélé, Kótóné wisirapó yópóló, kae kae ala yóló wēiné fokutu betere alakélé feata, mo tó tiki maaté wisiróturaalu du betera pó. Talené ama dā tēteróló kaae tawaaire kisi alané tó tiki maaté wisiróló ai du betere alarape fea mo ti kemeraalopó.

Yesu Kerisoné samea sunée farale ala

¹¹ Mió dāpaae i eró betere wisi alarape eraai, Keriso ą so whimó Talepaae momaratere topo whi bitī furaalu, folosóro ą doasi momatere kuti be wisimó buó dealepó. Ai beta, i haemó mo whiné naasenékélé ó mepaae ọla ọla aleale sukamókélé tēni, mo taketi Tale ą betere tikimó hāle tēne bepó.

¹² Keriso ą Kótóné ai kae tukóló muló betere tikipaae sókó faairaalu, *meme* ó *bulmakau* hupu

malené samea sóró feni, suka fea mo ti muó tanópóló, ama samea mo betá félimótóró melóló, ą ai be tuąpaae sókó felepó. Tétu, so whı fea dowi alané dokóló mupa, ai sameané teraayóló mo ti betó tanópóló dupuró beterapó.

¹³ Mepaae whı dené Kótóné yaąse yóló mole fo tukóló, nalo ama ala eraai momatere bepaae faąsóró doasi fo mulapó. Atérené *meme ó bulmakau* wą hupu sameané *ó bulmakau* so utų hupu simó biliyale fapo terepeyóló, ai yale alapi kemeranérapó. Atéró, nalo ti Talené ala eratepa fo muni, mo şumó eranérapó. Ti ai alarape feata, hałe tó tiki maaté fukuturaalu dapó.

¹⁴ Téyaleteti, ai du betale alarape bosenóló, mo ti betere Deı Kepe Wisiné Keriso ą fotokąratepa, me alakélé munire betere bete wisinaale Kótópaae hałe melalepó. Dąné hosaa tuąmó mole dowi alané sukutere alapaae ąlisóró fu betepa, Kerisoné ama sameané şumó kemeranérapó. Atére beteta, mo ti betere Kótóné ama ala dąné erópóló yalepó.

¹⁵ Keriso ą atéyale betené Kótóné so whı tao saalopóló, kisi yóló mulale dirii fo eraaire tuą whı alée felepó. Aita hałe mei, Kótóné ą beterepaae ape yale so whıné ama eraalopóló mulale mo ti muó tawaaire ąla wisi sópóló yalepó. ą atéró sukąle alata, folosóró ere dirii fo aąmó bitu, dowi ala du betale so whı dokóló moleteti, teraayóló hałe fópóló, dupurótu erapó.

¹⁶ Me whı ą sukuturaalu, ama mómu ąla taleyóló sae yóló mulatere fo kisipa muae. Ai whı ą sukuni hałe betepatei, ama ąla ąla hapale taleyóló şumipó. ą sukutepa, nalo ti ama yóló mulale fótóró sya

fóló senérapó.

¹⁷ Ti noatepae, kale whiné ama yóló mulatere fo sya furaalu, ʔ sukuni hʔle betepa, ama ʔla ʔla taleyóló saalomeitei, ʔ sinitepa ti senérapó.

¹⁸ Atétu dere kaae, Kótóné ama so whi tao saalopóló folosóro ere dirii fota, *sipsip ó bulmakau* hupu samea sókó faraleteiné diriralepó.

¹⁹⁻²⁰ Kótóné yae yale fo fea Moses-né mo so whipaae yóló kemetepa, i ala yalepó. *Bulmakau* hupu malené samearó mo weitamó belere tikipaae fóló, mo sonaare *sipsip* hupu nikiró *hisop* ni teteitamomó tópuró sóro asere sókumókélé so whiné tikimókélé, apuralepó. Ai ala yóló kemetepa, i fo yalepó.

“Ita, Kótóné ama tukóló muló betere dirii fo sya fóló, eró tawae yóló diriróturaalu, eratere samea i ape,” yalepó.

²¹ Ai ala kaae, Talepaae momayaairaaalu tene kuti bemókélé, ai be tuamó Talené ala eraai mole ʔla ʔlamókélé, Moses-né ai samea sóro apurótua ipakalepó.

²² Ita, mo dere alapó. Kótóné tukóló muló betere foné fea ʔla fea Talené ama ʔlapóló ʔale mulóturaalu, sameané betʔ fokonérapó. Samea sókó farénitepa, ti dowi ala tokóló aluranénipó.

²³ Hepen bemó ere ala suróló, i haemó aleale mo ʔla ʔla Talené amapóló ʔale mulóturaalu, samea dilótua yaleteti mo donorapó. Tépateti, hepen bemó mole mo alarape fokaai, ti i haemó mole ʔla bosene fale ʔla wisinaalené sumó fokonérapó.

²⁴ Ti Keriso ʔ sukóló kepaayóló furaalu, hepen be suróló i haemó mo whiné tɛyale bepaee sókó

feni, mo hepen bepaetóro sókó felepó. Atéro fóló, Kótó betere felekemó bitu, mió ą dą so whı tao sere tuą whı beteropó.

²⁵ Kale momatere be tetoróló kaae tare topo whıta, whıné tetóló ama kae tukóló muló betere be tuąpaae ba fo dokọ mo betą féli furaalu, ama samea sóro feni, hupuné samea sóro fua dapó. Ai whırapené dere kaae, Keriso ą hepen-paae momó fu, momó fu ini, mo betą félimótóro ama tiki Talepaae hąle melóló, sókó felepó.

²⁶ Keriso ą hepen bepaee dekéro félimó fuąsóro, ti i haemó ere ọla ọla fea keké nale alimó kaae sóro, sekei ala dekéro félimó beleté fu bituąpó. Ténı, i kemetere alimó ą Kótó beterepaae mo betą félitóro sókó fóló, dowi ala mo ti kemeróturaalu, ama betere bete Talepaae hąle malepó.

²⁷ Dą so whıta, Talené ere fo dokonóturaalu, bitiré fóló betą fapotóro sukutua dapó. Atéro sukąle kılıpaae, ti dąné yale ala Talené taleyaalopó.

²⁸ Dą betą féli sukutere kaae, so whı feané dowi ala tokóló aluraai, Kerisoné ama betere bete Talepaae mo betą félimótóro melalepó. Atéro mió ą momó waaireteita, dowi ala tokóló aluraai waalomeitei, ą wópóló kaae tawóló betere so whı tao sóro mo ti wisiyóló beteraai dapesene waalopó.

10

So whıné dowi alamó Yesuné betere bete mo betą félitóro male ala

¹ Kótóné tukóló muló betere fota, mo ti muaaire ala mei, take nalo waaire wisi wisi alané aso

maaté erapó. Atére betené kale tukóló mole fo sya furaalu, ba fo dokọ hupu dóló moma yó tare alané Kótó betere felekemó bitị faaire so whịné sekẹi ala mo ti wisiranénipó.

² Ai alanétamo so whịné hosaa tuámó mole kisipa tiki fea mo betạ félitóro wisiróluasóro, ti atima etei kaae dowi ala yalepóló, atimatei Talepaae momaraterere ala dekeró yó ta uameipó. Ti noatepae, atima etei kaae dowi ala yalepó tuẹ muameipó.

³ Atérené ba fo dokómó hupu dóló momaterere ala hụle deté fu betere kilitu, dowi ala kemeni, atima tuámó hụle mulapóló hụkearóló yó matapó.

⁴ Ti noatepae, wạ *bulmakau* ó *meme* hupu sameané dowi ala tokóló mo aluranénipó.

⁵ Atérené Keriso ọ i haepaae wóló i fo yalepó. “Hupu dóló momaterere alaró hụle materere alatamo naao hẹkese inipa, naaotei ẹ mo whịné tiki daaróló beteralepó.

⁶ Simó sukụlaa daróló momaterere alaró dowi alamó Talepaae hụle materere alatamo kilituraalu, naao kisipa felénipó.

⁷ Atétepa yalo duraalu, ‘E tẹteróló kaae tare Kótóo, kale bopeyóló mole asẹ tuámó ere fo mo dokonóturaalu, naao kisipa mole ala eraai ẹ wóló i betere ape,’ ” erapó.

⁸ Folosóro ama duraalu, “Kótóné tukóló muló betere foné i ala yae yóló mupatei, hupu dóló simó sukụlaa dalaterere alaró Talepaae materere alatamokélé, dowi alamó materere alakélé, fea naao kolóló hẹkesenipó,” erapó.

⁹ Ai alarape yale sisópaae ama duraalu,

“Naao kisipa mole ala eraairaalu, ę i wale ape,”
yalepó.

Atéró, folosóró hupu dóló du betale alarape tokóló
taae faróló, ai sirimó ą sukale ala mo ti yó tanópóló
eralepó.

¹⁰ Yesu Kerisoné ama tiki Talepaae mo betą félitóró
hale melóló sukaleteiné, Talené ama kisipa mole
alatóró sya furaalu, da ama so whıpóló mo kae
beteralepó.

¹¹ Be dętere dokọ fea momatere be kaae tare
whırapené Talepaae hupu dóló momatere ala
hale yó tarapó. Atétere alané dowi ala mo ti tokóló
aluranénipó.

¹² Tépatei, mió i bopetu betere momatere
doasi topo whı Yesuné dané dowi ala tokóló alu-
raairaalu, ama betere bete Talepaae mo betą
félitóró hale malepó. Atéyale kılıpaae ą ama alima
Kótóné turu naase eró betere tikimó fóló betalepó.

¹³ Ai alarape kemeróló, mió ątamo bóe du betere
whı fea ama tęteróló só deraaire ala betą Kótónétei
erópóló, kaae tawóló beterapó.

¹⁴ Ti noatepae, mo betą félimótóró ą sukutu-
raalu, Talepaae ama hale male alané wisiróló, mo
kae so whı betó tanópóló yalepó.

¹⁵⁻¹⁶ Deı Kepe Wisinékélé Talené ai ere ala
dapaae yó móturaalu, folosóró i fo dapó.

“Ai alarape yóló kılıpaae yalo atima tao saairaalu,
yóló mulatere diri fo i ape.

Yalo tukóló muló betere forape atima hosaa
tuamó mulóo, atima kisipa keteni tuę yó
tanópóló yalotei eróo yaalopóló,” Talené er-
apó.

17 Ai fo tó mó me beleróló duraalu,

“So whị Kótóné fo aqómó bitini, atima kisipa mole ala maaté sya fu betere alaró mepaae dowi alatomómó kwia meni, yalo aluróló kisipa keteraalopó,” erapó.

18 Ai dowi alarape feata, Talené mo ti kemeró beterepa, hupu dóló Talepaae matere ala momó kae haḷe noatepa yaaloé?

Talené ala taaréni, haḷe eró tawae ere fo

19 Térapa, no nerape-ó, dāpaae Yesuné ama samea sókó faló betereiteiné Kótóné mo kae ere be tuāpaae faaire wini, mo halaainé sókó fenérapó.

20 Taketa, ai be ke sataḷe yóló oleró betere kuti tuāmó sókó fua yalepó. Mió Yesu sukóló a mo ti betere bete matere kisi tu alée faleteiné a tuāmótóró sókó fenérapó.

21-22 Ai ala maaté mei, Kótóné fake so whị tao sóró, momaratere doasi topo whịkélé beterepa, dā aḷpaae tué tiki tiróló bitu, hosaa tuāmó haḷtamo Kótó betere felekepaae fenérapó. Atéturaalu, dāné i dowi ala yalepóló hosaa tuāmó sekei kisipa mutereitei ama sameané fokóló feléroó, dāné tikikélé mo kikisi weḷiné fokóo, ereteiné mo halaainé fenérapó.

23 Ti noatepae, Kótó aḷa, dā so whịpaae eraalopó dere wisi ala haḷsókó fóló taaréni, mo eraalopóló dāné so whịpaae du betereitei taaróló haepaae derepaalomei, haḷtamo yó tawaalopa sae.

24 Dāné no nepaae yaala sókó fole alaró wisi alatamo fakeyópóló, ketekeḷe u bulótu i bulótu dere alatamo netéro yaaloé yóló, tué teketu betae.

²⁵ Mepaae so whi atima Keriso fake tourótua dere tikipaae wale hótú dere kaae, da momókó yaose. Têni, Talené da dape saaire be de felekemó walapa, betere dokó ama ala erateretei taaréni, keteké u bulótu i bulótu dere ala mo ti fakeróló deté fu bitiépe.

²⁶ I bete mole mo fo dané wosóló tuérutei dowaae fóló, dowi alatamo hale yó tapa, ti ai ala kemerópóló Talepaae melaaire ọla me kae munipó.

²⁷ Kótótamo atéro bóe duraalu, du betere dowi ala hale yó tapa, Talené fo tokótamo yóló só de-raaitere alaró ai whirape dalaaire sitamo kolóló, mo wió yae.

²⁸ Take mepaae whiné Moses-né aseýóló muló betere fo tukóló yale ala, tamo ó sore whiné kolóló mopó depa, ti ai whi kọletere ala ini, mo ti sinópóló dua ipakalepó.

²⁹ Mepaae so whi dené Kótóné naalema belei ọla kaae aqróló teiya teiya yóo, Talené ama fo dirirale sameané fokóló kae beteró betepatei, ai samea hale ọla kaae aqróo, Talené ai whi hale hamokoróló tao supatei, ai ala erótu betere Kepe Wisi faleýóo depa, ti atétere whi a kwia saairetei hásókó faalopóló de? Ti folosóro Moses-né yale fo tikitepa, dowi kwia mo salepó. Atéyaletei, mió ai alarape dere whiné saaire kwiata, folosóro sale kwia bosenóló mo doasi saalopó.

³⁰ Ti noatepae,

“Kwia tokó matere ala hásókó feni, mo ọlotei yaalopó,” yale sekéta, dané kisiparapó.
Me fo i ape.

“Talené so whiné du betere ala mo amatóro taleyaalopó,” erapó.

³¹ Mo ti betere Kótóné naase tuapaae foleteita, wi alapa mo wió yae.

³² Diāta, mo take bitiré wale sukamó, Kótóné fo woseté waletiné diā tuamó deyo falapó. Atéremó, diāpaae kae kae sekei ala wapatei, diā wiyóló botokó feni, mo diriyóló betale ala kisipa muae.

³³ Ai maaté mei, me sukamó diā so whi feané keletómó sóró daalóló, susupui alaró haleraterere alatamo eróo, me sukamó diā sere seke kaae, diaaḡ no nerapepaaekélé eratepa, diākéle atimatamo betamó titiyóló daalu beleyóo, dua yalepó.

³⁴ Atére kaae, atimané diaaḡ ne norape *dipula* beteratepa, ḡle duraalu, atima tao sua yalepó. Atimané diaaḡ mole ḡlakélé fasó supa, mo ti muó tawaaire ḡla wisinaale saai dapóló haḡturaalu, atima sḡpóló taalatua yalepó.

³⁵ Térapa, ai ala deté furaalu, diaaḡ kisipa tiki tiró betereitei haḡle ḡla kaae taae faréni, mo hotowaró tao tawae. Atétepa, ti mo dupu wisinaale saalo ai ape.

³⁶ Kótóné ama kisipa mole alatamo eratepa, ti ama diāmó melaai dapóló bopere ḡla saasepólópa, diāné kisipa tiki tiróló, diaaḡ du betere alatóro haḡle yo tanérapó.

³⁷ Ti noatepae, Talené i fo erapó.

“Mo haḡleke sukamó waalopó ere seké a waaitere be de ḡliki faréni, ai be demótóro mo waalopó.

³⁸ Téyaalotei, yaḡlo donoi alatóro erotu betere whiḡta, ti kisipa tiki tiraterere alanétóro betaalopó.

Ama kisipa tiró betere ala momó wotaale depa, ti ai whıtamo yaalo kisipa felé yaalo meipó,” erapó.

³⁹ Tépatei, da atei kaae wotaale yóló aluyaaire so whıtamo touyóló bitini, apaae kisipa tiki tiró betepa, da aluyaqsóró Kótóné tao serapó.

11

Kisipa tiratere alané mo betenérápó

¹ Tué tiki tiróló betere so whıné nalopaae yaaire wisi ala mió kilinitei, take mo kelaalopóló diriyóló kisiparuraalu, haıtu beterapó.

² Mo take betale so whıné atei ala deremó, Kótóné mo wisirapóló atima dukiró beterapó.

³ Kótóné i ala yó fae depa, ere ıla ó betere ıla ılakélé fea motóró yó fipakalepó. Ti mió kelené keletere ıla ıla feata, kelere ıla sóró aleni, ama fotokó bole fonétóró kaaró beterapóló, da Talepaae tué tiki tiró betereiteiné mo diriyóló kisiparapó.

⁴ Ebel a tué tiki tiró bituraalu, Talepaae mo wisiyóló haıle maletiné noma Kein-né male ıla tetereılipakalepó. Ti Ebel a kisipa tiki tiró bitu matere ıla Talené kilitu, wisirapóló a dukiróló mo donoi whıpó erapó. Ebel ata, take suku-patei, Talepaae ama kisipa tirale ala asemó mulu, dapaae haıle du beterapó.

⁵ Inoke Talepaae kisipa tiki tirale betené a sukuni, itéro mo betepatei, Talené hepen-paae dapesó horapó. Mepaae whırapené a kekalemó, Kótóné dapesó feleteiné mo koló fenipó. Kótóné buk-mó duraalu, Inoke a hepen-paae faai i haemó

håle bitu, Kótóné ama kisipa mole ala erótu betepa, å mo hękesené sinipakalepó.

⁶ Mepaae kisipa tirénire so whinė Kótó å hękese yaaire ala mo eranénipó. Ti noatepae, mepaae so whı de Kótó beterepaae wapa, ti å mo beterapóló kisipa tiróo, Kótó å i betere ape yóló yó melaalopóló ketekętamo kekitu betere so whı kilitu, Kótó å mo hękeserapó.

⁷ Talené Noapaae take naao kilini yale ala nalopaae mo eraalopó yale fo Noané mopóló kisipa tiralepó. Atéru, å tuamó Kótópaae mo kae wi yóló, ama naaleraperó atimané sorapetamo yóo, ama soma atimaamo yóo yóló betå aluyaosóro, tuę tiki tiró bitu nuku alipakalepó. Atéyaleteiné ai alimó betale so whinė dowåae fóló du betale ala mo só deralepó. Å atéro tuę tiki tiratere ala Kótóné kilitu, mo donoi whıpó yaaire doi melalepó.

⁸ Talené nalopaae Abraham å melaaire hae kwiapaae fópóló, dotęyaai åpaae ape yalepó. Ai fo depa, å faaire tiki kisipa inirutei, tuę tiki tiró betere alané Kótóné dere fo mo betå wosóló felepó.

⁹ Kótóné Abraham åpaae yale fo mo eraalopóló tuę tiki tiróló, å melaalopó ere hae tikimótei uké whı kaae bitu, kuti be torokóló tęté kutu betalepó. Ama naale Aisak-kélé, Jekop-kélé, ama ere fo dokonóturaalu, ai hae tiki saaire whırapetei, Abraham å yale kaaetóro deté kutu betalepó.

¹⁰ Abraham-ta, å betere haemó kisipa muni, take nalopaae dirii ęla sóro tene mo ti bemó beaalopóló kisipa mutu, kaae tawóló bitipakalepó. Ai be tęyaai đåle sóo, be tęyóo yale sekęta, Kótó

atórótípó.

¹¹ Abraham a mo ti otere yóo, soma Serakélé hãle ni daayóló sere yóo epatei, tuę tiki tiró betere ala Talené kilitu, naale deyaaire fotokọ bulalepó. Ti ai ala eraalopó yóló mulale sekéné fo mopóló kisipa tiki tiraletéiné yalepó.

¹² Ai betã whıteı a otereyóló mo felekemó sinaai du bitutei, ama deale naalené kaaróló, naale senaale mo hãle ọla kaae deté felepó. Ai naale senaaleta, samó daale hõreró wẹi atikãtamo kaae ereteiné dosãyaaire mo sunipó.

¹³ I dosãyale whırape atima fea kisipa tiki tiratere ala hãle deté fu betepatei, sukutua yalepó. Ti atima hãle betale alimó kale melaalopóló muló betere ọla atimané sinitei, mo umó teó wou betepa, tuéné maaté kolóló mo kée deté fu betalepó. Atétu, atimané duraalu, “Dãta haemó betepatei, i hae tale mei, uké whı kaae i betere ape,” du betalepó.

¹⁴ Atei kaae fo dere whırape atima mo ti betaaire hae tiki kekıtu beterapóló hãkearóló yó matapó.

¹⁵ Ti atimané atei kaae dere fotamo, take taaróló wale hae tikimó uasóró, ti atima turuku bepóló kisipa mutu, momó fesaae fole ala uapó.

¹⁶ Aténi, mo ti betaaire hae wisipaae fenée kisipa mutu beterepó. Ai hae tikita, me kaae mei, mo hepen betórótípó. Atéreteiné atima Kótópaae duraalu, yãta dã tětéróló kaae tare Talepó depa, ai fo wosetu Kótó a haleni, mo dono dapó kisipa mutapó. Ti noatepae, ai be huluata atima mo wisiyóló beterópóló, ama taketi donoróló muló beterapó.

17 Abraham-né kisipa tiki tiró betere ala Kótóné k̄aae kolóló, s̄u sale sukamó, Abraham ̄a kisipa tiró bitu, ama naalema Aisak dóló simó suk̄ulaa dalóló Talepaae h̄ale melaai yalepó. Kótóné ̄apaae wisi ala eraalopó yale fo tūérutei, ama mo bet̄a betere naale daai yalepó.

18 Take Kótóné ̄apaae duraalu,

“Naao naale Aisak-né detere naalené naao doi muaaire fake firaalopó,” erapó.

19 Ti Abraham-né ama ai ala yaleteita, mo ti sukutere wh̄i Kótóné ama s̄umó kepaaraalopóló kisipa mutu yalepó. Até yaletei, ama naalema Aisak ̄a sukóló momó kepaayale wh̄i kaae ̄appa dape salepó.

20 Aisak ̄a Talepaae kisipa tiró bituraalu, ama naale Jekop-ró Isotamo nalopaae betaaire alamó kisipa mutu, foné atimaamo wisiralepó.

21 Atéyale kaaetóró, Jekop ̄a Talepaae tūé tiki tiró bitu, ̄a felekemó suk̄airaalu, ama dotó tiki tómó tiróló daalu, naalema Josep-né naale tamo foné wisiróló, Talepaae mo k̄ee yóló momayalepó.

22 Josep kisipa tiróló bitu, ̄a suk̄aire be d̄e feleke depa, kale Israel fake so wh̄i Isip hae kwia taaróló, torokó faalopóló kisipa mutu, atimapaae ama diri sóró fae yalepó.

23 Isip hae kwia t̄eteróló kaae tare topo wh̄iné Israel so wh̄iné naalerape dae yóló tukóló mulélipakalepó. Ai fo epatei, Moses-né hamaró alimatamo wini, Talepaae bet̄a tūé tiki tiró bitu, ai naale wisinaale daqsóró, wélié sore tūamó ̄a hyó mulalepó.

24 Moses doayóló Talepaae kisipa tiki tiró bitu, ą topo whı Fero senaalemané naalepó yaqse yóló fo mulalepó.

25 Moses ą sawa sukamó maaté tó tikimó felétere dowi ala yaai kisipa muni, Kótóné so whıpaae erótu betere sekeı ala ąpaaekélé erópóló kisipa mutu, Talené so whıtamotei toune felepó.

26 Moses ą so whı teteróló kaae tare seké Kerisoné ala erótu beteremó, faleyóló haleratere ala kolósu, Isip haemó mole wisi wisi ọla kolósu yalemó, Kerisotamo betere ala mo doasi ke boleteiné take nalopaae Kótóné dupu wisi melaalopóló kisipa mutu, ą ai ala sya felepó.

27 Moses ą Talepaae kisipa tiró bitu, kale Isip hae kwia teteróló kaae tare topo whı fopaae buóló, ąpaae sekeı ala eraqşórópóló wini, Isip kwia taaróló felepó. Ti noatepae, aıta kelené kelenire seké ama kelereteiné, ama yaai dere ala betą hąle yó taruraalu yalepó.

28 Ȧ Talepaae kisipa tiró bitu, Kótóné doteyale whı dele *ensel*-né Israel fakené topo naalerape daqşóró, bosene fele be demó ọla detere alaró wą *sipsip* hupu malené samea dilatere alatamo, Talené ąpaae yae ala deté fu betalepó.

29 Kótóné so whı Talepaae kisipa tiró bitu, sonaai wẹi kẹla tuamó tukóló, mo ere hae tiki kaaemó atima teyóló felepó. Tétepa, Isip fake atimakélé Israel fake yale kaae teyóló felemó, wẹiné atimatei mo ti alurélipakalepó.

30 Talepaae kisipa tiró bitu, Israel fake so whı wẹikeró be demó, Jeriko be hulua bopére dopóku bolaa aqró bopé yóló kutu betalepó. Atéyalemó,

kale doasi dopóku ama kọleaanétei kolokóló dere-pelepó.

³¹ *Moni* saairaalu nópu nuku betale so Rahab ẹ Talepaae kisipa tiró bitu, kale bóe sẹ fele whịrape ama bepaae wisiyóló dape salepó. Téyaleteiné Talené fo tukóló dowaae fu betale so whị fea dóló kemeróturaalu, ẹ betẹ ẹsókó felepó.

³² Atimané ai yale alarapemó yalo kae me noa fo yaaloé? Kale doasi doi mole kisipa tirale whịrape Kideon, Barak, Samson, Jepta, Depit, Samuel, mepaae Kótóné kọlọ whịrapené yale alakélé fea diapaae dekéro uętei, yaaitere be de dekéro munipa taalatapó.

³³ Ai whịrape atima Talepaae kisipa tiró bitu, mepaae ęteróló kaae tare topo whịrapetamo bóe dóló atima ęteróo, so whị mo wisiyóló kaae taru donoi ala eróo, Talené atimapaae melaalopó yale ọla mo sóo yalepó. Atéro Talepaae kisipa tiró bituraalu, whị dó nokole haę *layon*-rape kulumu faaralepó.

³⁴ Whị dokole doasi simi surukó fío, whị dele fosói sepakekélé ẹsókó fío, dua erapó. Atima mo whị bépatei, Kótóné doasi fotokọ bulalepó. Tétu, atima bóe duraalu doasi fotokóné kae kae hae kwiamó wale bóe whịrape dóló mo ti kemeratepa, mepaae ẹsókó fele whịrape ti botokó dapo yalepó.

³⁵ Mepaae sorape atimané naale senaale ó omarape sukẹletei, momó kepaaratepa atimatamo betámó bitua yalepó. Mepaae so whị atima kisipa tiró betepa, mené doasi susupui ala eróturaalu, diẹ teraayóló faraalopa, Talepaae dowi

teka fo yae yóló sɛtua yalepó. Ai ala depatei, atima sukutepa, momó kepaayóló Taletamo wisiyóló betaalopóló kisipa mutu, atei kaae fo yaalo meipó, dua ipakalepó.

³⁶ Mepaae so whi faleyóló fokosoi ala yóo, mepaae so whi ti dirii képiné dokóló *dipula* beteroo dua yalepó.

³⁷ Mepaae so whi kapo duné dóo, mepaae ti ni tikitere *saw* fosóné fosóné tuamó tekéetamo yóo, mepaae bóe dele sepakené dóo, dua ipakalepó. Mepaae so whi hoko kuturaalu kutikélé nokole ɔla ó bekélé meitepa, *sipsip ó meme* hupu sekaɛ bukutua yóo, Atima mo yoleale betepa, susupui alaró kae kae dowi alatamo eróo dua yalepó.

³⁸ Atima atei kaae seke su betale so whi kolósu, i haemó betó mole mo so whi kolósu depa, seke sere so whiné atima mo belei aɔróló teraae falapó. Seke sere so whi atima torokó kuturaalu, kópu kaae fi tikimókélé, hasi fosómókélé, kapo dolomókélé, hae dolomókélé, hoko fité kutua ipakalepó.

³⁹ Ai dosayale so whi atimakó mo beta whiné kélé Talené melaalopó yale ɔla sinipatei, kisipa tiró betere ala kilitu, Talené mo wisirapóló atima dukiralepó.

⁴⁰ Atimapaee erale alaró ɔpaee eratere alatamo, touróló eraté fóló mo ti kemerópóló, Kótóné atimapaee erale ala bosenóló, ɔpaee eraaire ala wisinaale ama tukóló mulalepó.

12

Kótóné ama naale senaale kópaee fupa,

donoróló deké sua dapó

¹ Térapa, Kótóné doasi alarape eratepa kelalepóló u bope deté wale so wh̄iné d̄a bopéró beterapó. Atérapa, Talené atima tao sóró erale alamó kisipa tiratere kilitu, d̄a sururu yóló furaalu, mepaae bi pire ọla ọla taae falóo, d̄a hapale dée n̄ópóló ekeleperatere dowi ala taalóo, yaalopó. Tétu, Talené muló betere d̄alemó sókó faairaalu, naase h̄ale sururu yóló fótóró tawiépe.

² Atéró furaalu, kisipa tiratere alakélé amatóró kaaróló, mo ti kemeratere alakélé Yesunétóró dua dapó. Térapa, d̄ané kelené ai seké ątóró kikéyóló kaae tawiépe. Ti take nalopaae h̄ajtere ala mo eratepa kelaalopóló kisipa mutu, ai seké ą filipaa ni tómó doasi sekéi ala sóo, halei ala eratepakélé me ọla meipóló h̄ale siré f̄oo yalepó. Atéyale k̄ilipaae ą hepen-paae fóló, Kótóné fea ala t̄eteróló kaae tare tikimó, ama turu naase demó betalepó.

³ Ti take dowi ala dere wh̄irapené Yesutamó bóe duraalu, sekéi ala ąpaae eratepatei, h̄ale beleté fu betalepó. Atérapa, dīapaaekélé sekéi ala eratepa, dīa fomoyóló haepaae derepaqsóró, ama ai ere alatóró kisipa muae.

⁴ Mepaae wh̄irapené dowi ala fakerótu betepa, atei kaae dowi ala dorapóló dīané sesé deremó, dīa dóló samea sókó fatere ala ini, teópó.

⁵ Ti dīaṭa, Talené ama naalepóló keteké bulótu, ere fo diaaṭ kisipa keteró beterapó. Ai fo i ape.

“Yalo naale-ó, Talené ȳa donoróturaalu dóló supuratepa, ai bete munire ala dere nisi yaṭse. Aita, diaaṭ du betere dowi alamó dīa foné sirapa, seké duraalu, h̄oyóló taalaṭse.

6 Ti noatepae, Talené ama hosaa mulu yaala sókó fu betere so whi donoróturaalu dóló supuróo, ama naalepóló dape sere naalerape atimané h̄asókó fole alamó kwia melóo, dua dapó,” erapó.

7 Diapaae sekei ala erótu betepa, ti aita dī Talené ama naale donoróturaalu dere alapóló kisipa mutu, beleté fu betae. Ti mé naalekó donoi t̄upaae f̄ópóló, ama alimané foné sóró dele ala dumié?

8 Kótóné naale senaale fea h̄asókó fupa donoróturaalu, supuróló dua dapó. Dī h̄asókó folemó, Talené dóló supurénitepa, ti dī ama naale senaale bitini, h̄oko naale senaale ai ape.

9 Ai fotamo olekeyóló me dere fo i ape. D̄a fea k̄opaae fole sukamókélé, mo h̄ale betere sukamókélé, sekei ala beleyópóló fotok̄o bulóturaalu, i haemó betere ayarapené d̄a donoróló supurótua deretei kisipa muae. Atétere alata, atimané mo dono dapóló kisipa mualepó. Ai ala mo ti bosenóló, d̄ané kepe t̄eteróló kaae tare Ayané d̄a donoróturaalu dóló supuratepa, ti ama erópóló ̄a aomó sukóló betenérápó.

10 I haemó betere d̄ané mo ayarapené d̄a t̄u wisipaae f̄ópóló kisipa mutu, donoróturaalu sawa sukamó maaté dóló supurótua dapó. Tépat̄ei, d̄a Kótóné ama kae ere wisi ala tuamó beterópóló kisipa mutu, d̄a k̄opaae fupa ama donorótu beterapó.

11 Donoi t̄upaae f̄ópóló, supurate sukamó felé dumi, supu dua dapó. Téyaalotei, ai alané donoróló asa dere so wh̄ita, take nalopaae hosaa muni

deyóló mo dua betere alaró, mo donoi alatamo atima tuámó epa kelaalopó.

¹² Térapa, sekei alané diã fótururóló Talené ala diaaḡ erótu beteretei haepaae derepaḡsóró, bére hó naase fotokḡ bulatere ala du betae.

¹³ Diaaḡ doalére hó mo ti doyaḡsóró, diã kweyaaire tu mo wisiyóló aleyae.

Kótó hóróló sisópaae eraḡsóró hotowaró kaae tawae

¹⁴ So whi featamo bóe dóló hḡle sere ala ini, Kótóné ama hosaa muni deyóló dua betere alaró ama kae ere alatamo, diã tuapaae erópóló, ketekeḡ butu betae. Ti Kótóné ama mo kae ere ala munire so whiḡa, Tale mo kelaalomeipó.

¹⁵ Diãkó me whi ama hekesere ala sya fu-raalu, Kótóné hamokoróló hḡle tao sere ala ḡsókó faḡsóró yae. Tétu, diaaḡ ne notamo mutere dowi hasekḡai kisipa so whi feapaae tokóló, me whi doraḡsóró, mo hotowaró kaae tawae.

¹⁶ Diãkó mepaae so whi nópu nokole ala ó Kótó faleyóló hḡko betale whi Iso kaae betaḡse. Ti Iso ḡta, alimané mómu ḡla ḡla saaire topo naaletei, ḡ wotepa ai mómu ḡlané betḡ be demó naaire ḡla nomatamo dupuyalepó.

¹⁷ Atéyale kḡlppaae kale sekéné ama alimapaee ḡkélé wisiraterere fo yae yóló woletamo yaleteti, alimané ama dere fo mo wosenipó. Atétepa, ḡ wole-tamo yalemókélé, ama tuḡ tiki feteyaaire suni, mo hapólu yalepó.

¹⁸ Take Talené so whi fea touyóló bitu, kelené kolóló olaa dere hasi fosó erepó. Ai hasi fosómó

si dóo, be mo diliki yóo, doasi beséró hali tiki-tamo wóo, mepaae mo winé sini alakélé eróo, dua yalepó. Ti diąta, atére hasi fosópaae wénipó.

¹⁹ Ai hasi fosómóta, ukulumó wuti hale yóo, mené fo fakeyóló depa wosóo duraalu, atima atei kaae fo wosetere hórapa, me yaqse du betalepó.

²⁰ Ti noatepae, Talené atimapaee yóló mulóturaalu,

“Ai hasi daale felekepaae so whı́ ó hupu, na ó kae kae ọla fupa, ti kapo duné dóló sukunae,” ere fo atima wosaletéiné faalo wiyalepó.

²¹ Moses-né ai hasi fosómó mo winé sini ala du betepa kolóló, i fo erapó.

“E mo winé sukuturaalu diri furu furu dapó.”

²² Ti diąta, atéyale hasi fosómó wóló bitini, mió dią betere hasiné doita, Saion-pó. Ti dią wóló ai betere tikita, hepen bemó Kótóné ama tẹteróló kaae tare doasi Jerusalem be huluapó. Ti diąta, *ensel*-rape ni sóku kaae mo dekéró touró bitu, hẹkesetu betere tuámó wóló ai betere ape.

²³ Aita, Talené ama topo naale senaalepóló sóró betero betere so whı́ fea touró betere tikipó. Ti ai so whı́né doita, hepen-mó aseýóló muló betera-pó. Ti diąta, so whı́ feané dere ala taletere Kótó beterepaae wóló, ama take donoróló beteraale so whı́né keperape betere tikimó, ai betere ape.

²⁴ Diąta, ama so whı́ tao saalopóló yóló mulale kisi fo dirirale tuą whı́ Yesu beterepaae walepó. Ti ai sekéné ama samea so whı́né tikimó apuróturaalu yale foné Abel-né sameané dorae yale fo tẹteró betera-pó.

²⁵ Diąpaae ai fo du betere seké diąné sisópaae eraqsóro yae. Ti noatepae, Kótóné kutó dirale mo

hae whjné so whjpaae duraalu, “Diaaḡ hḡko du betere ala taarénitepa, ti Kótóné kwia melaalopó,” dere fo woseni, sisópaae eraleteiné dowi kwia matere ala atimané mo salepó. Atérapa, hepen bemó betere sekéné dere fo sisópaae erateremó, atimapaee ai erale ala mo bosenóló, ḡapaee melaaire dowi kwia netéró ḡasókó faaloé?

²⁶ Take Talené ama fo yalemótei hae wore ipakalepó. Téyaletei, mió ama i ala yaalopóló muló beterapó.

“Taketa, hae maaté yaḡo woreraletei, mió ti saḡó haetamo wusuró woreraalopó,” erapó.

²⁷ Momó woreraalopó dere fo bete i ape. Wore ini, dirire alaró ḡla ḡlatamo ti enópóló, Kótóné aleyóló muló betere ḡla ḡla whaaló yóló wore deretei, ti ama woreróló mo aluraalopó.

²⁸⁻²⁹ Kótóné ama teteróló kaae tare alata, mené wore worekélé mo eranénipó. Ti ḡata, atére ala tuḡpaee fóló beterapa, Talepaee mo kée yóló, ḡa witamo ḡ aḡmó sukóló bitu, ḡekese yaaire ala betḡ du betaalopa sae.

“Ti noatepae, ḡa teteróló kaae tare Kótó ḡta, ḡla ḡla fea doló kemeratere si sḡ beterapó,” erapó.

13

Mo kemeróturaalu ketekḡ bulatere fo

¹ Mepaae no netamo yaala sókó fole ala hosaa mo turóné yó tawae.

² Uké wale whj diaaḡ bepaee wisiyóló dape sóró, ḡla melóló firatere ala taaréni, mo yó tawae. Ti noatepae, take mepaae whjrape atima mo kḡleaa

whiné *ensel-rapetei*, mo whi nisiyóló dape sua erapó.

³ Mepaae no nerape *dipula* betepa, ti diákélé atimatamo *dipula* betere aq yóló, atima kisipa hãle yó tawae. Tétu, mepaae whirapené naao no nepaae sekei ala eratepa, diákélé ai seke sere aq yóló, atima kisipa hãle yó tawae.

⁴ Soró whitamó dokotere alata, mo donoi alapa diã feané hale horótu betae. Whiró sotamo dokore ala folokole yaqsóro, so whi kaetamo fiyóo, whikélé so kaetamo fiyóo momókó yaqse. Ti noatepae, atei kaae nópu nokole alaró kae kae nópu nokole alatamo du betere so whita, Kótóné taleyóló dowi kwia melaalopó.

⁵ Diã betere tuamó *moni* mo doasi bete mole ɔla nisiyóló diãné tué tiki turó ai ɔlapaae momókó mulaqse. Téni, meteró ɔla ɔla mupa, ti aitóro súpóló kisipa muae. Ti noatepae, Kótóné duraalu, “E diãtamo betereitei taaróló, metikpaae mo faalomeipó. Téturaalu, yało diã tao su betere alakélé hãle yótóro tawaalopó,” erapó.

⁶ Ai fo wosetu dã whaaliani, halaainé i fo dua dapó.

“Talené ama e tao sóro mo wisiyóló kaae tareteiné, mo whiné epaae noa kaae sekei ala eratepa e wiyaalomeipó.”

⁷ Take Talené alamó folosóro fóló, diãpaae Kótóné fo i ape yóló yó melale whirape atima Talepaae kisipa tiró bitu du betere ala kãae kolóló, noa kaae du wisi olepa, ti ai ala diãnékélé súpóló yae.

⁸ Yesu Kerisoné ere alata, take bitiré walepaaekélé, mió i betere alimókélé, nalo

betaaire alimókélé, mo betá kaae alatóro hãle yó tarapó.

⁹ Térapa, mió diaaḡ wosetu betere fo wisi taaróló, kópaae falaairalu, mepaae wh̄rapené kae fo yó matepa, mo dere nisiyóló wosaḡse. Kótóné keletómó wisirapó yḡpóló, ḡpaae moma yóló nuku betere ḡlané atima fotokḡ bulóló wisiraaire fotokḡ bunipó. Tépaitei, ḡa fotokḡ buóló wisiyóló beterḡpóló, Talené hamokoróló tao sere ala ḡa tuḡpaae eratepa, ai ke bole alané betá ḡa mo wisiranérapó.

¹⁰ I haemó mo so wh̄imó Talepaae momaratere wh̄rapené ḡané momatere kapo tómó bilitere ḡla naaire sunipó.

¹¹ Mo so wh̄imó Talepaae momaratere topo wh̄i *bulmakau* hupu samea sóro Kótópaae momaraai, mo kae tukóló muló betere be kepaae fóló, so wh̄iné dowi ala kemerḡpóló ai samea dilótua ḡapó. Tétua deretei, mo hupuné tikita, ti so wh̄i betere tiki taaróló, be bela ḡemó sukḡlaa dalótua ḡapó.

¹² Atétere kaae, Yesuné ama sameanétóro so wh̄iné dowi ala kemeróló, mo kae so wh̄i beteróturaalu, ḡ doasi sekei ala sóro doasi be hulua bolaare dopóku aḡmó sukḡlepó.

¹³ Térapa, ama tikimó sale halei ala ḡapaækélé erḡpóló, be taaróló ḡ sukḡle tikipaae faalopa fiépe.

¹⁴ Ti noatepae, ḡa mo ti betaaire doasi be hulua mekó i haemó tenipó. Téretei, take ḡa mo ti betaaire doasi be hulua kelaai kisipa mutu, ḡa kaae tawóló i betere ape.

¹⁵ Térapa, Yesuné ḡa fotokḡ bulatepa, mo wisi ḡla Kótópaae mótu dere kaae, Kótóné ama doi sóro horatere ala suka fea yó tawaalopa sae. Ti ḡa

tęteróló kaae tare Kótó ą etei kaae Tale beterapóló, ama doi sóró horatere alata, kutómó ęla wisi su dere kaae erapó.

16 Mepaae ęla ęla ęąąątere so whi tao sóró matere alaró eratere wisi alatamo kisipa keteréni, ęale yó tawae. Ti atei kaae alata, Talepaae ęale matere ęla wisi kaaepóló Kótó ą mo ęękeserapó.

17 Dią Keriso so whi kaae tare whi rapené dere fo wosóló, atimané tęteróló kaae tare aómó betae. Take nalo Talené atimapaee so whi netéro kaae tawaleé? yóló wosetepa, atima etéro kaae tawalepóló tokó melaalopó. Atima kutó ęękesetamo diyópóló atimané dere fo wosóló sya fae. Ai ala initepa, ti atimakélé kisipa sekętamo dituraalu, atimané ditere kutóné dią tao sere alakélé yaalomeipó.

18 Talené da tao sópóló momarótu betae. Dąné du betere ala dąnétei taleyalemó, so whi dilikitere ala me bunipó. Dąné du betere ala fea so whiné taleyóló, mo dono ala dapó yópóló, i ditu betere ape.

19 Yąlo diąpaae i dere fota, ę diątamo betaai hapale wópóló, momarae yóló dapó.

20 Kótóné so whi tao sóró mo ti muó tawaaire fo, Yesuné ama sameané diriróló mulalepó. Atéreteiné, bóe firóló mo dua betere ala kaarótu betere Kótóné, da tęteróló kaae tare whi Yesu ą momó kepaaró beterapó. Atéro kepaarale sekę ąta, Talené *sipsip* hupurape kaae tare doasi fotokó bole topo whi beterapó.

21 Ai Kótóné ama kisipa mole ala diaaę mo sumó erópóló, amatei wisi wisi alaró wisi tuętamo dią tuąpaae mo sęraalo ai ape. Atétu, Kótóné ą ęękese

yaaire ala Yesu Kerisoné da tuapaae erópóló yae. Ai sekéné doi doasi mulóló, hale sóró horatere ala hale deté fu betae. Mo kée téyópóló yae.

²² No nerape-ó, yało halekeróló i dere așeta, diaaę wosóló kisipa yaaitere sų i dere ape. Térapa, Kótóné ala etéro erae yóló așemó ketekeę bulóturaalu, i deté wou betere ma fo wosaalo hę yaęse.

²³ Dąné no Timoti *dipula* sókó wóló beteraóló, diapaae i dere ape. A ę beterepaae hapale wapa, ti dąmo wusuró dią keęle waai kisipa mutapó.

²⁴ Dią tęteróló kaae tare whįraperó Kótóné mo kaae betero betere so whį featamopaae yało kęleó dapó yae. Itali hae kwiamó wale Keriso so whįnékéle diapaae kęleó dapó.

²⁵ Talené ama hamokoróló tao sere ala dią fea tuamó muó tanópóló yae.

**Yesu Kerisoné So Whi Tao Sere Kisi Fo Wisi
The New Testament in the Falopa Language of Papua
New Guinea**

copyright © 2005 Wycliffe Bible Translators, Inc.

Language: (Folopa)

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

 You include the above copyright and source information.

 You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2009-10-31

PDF generated using Haiola and XeLaTeX on 18 Apr 2025 from source files dated 31 Aug 2023

0102a9df-173c-5a64-b766-14ab67a86105